

NRES tegaskan KL selamat dihuni

Kejadian tanah jerlus di Jalan Masjid India akibat aktiviti manusia, cuaca, hakisan tanah tambak

Kuala Lumpur: Siasatan oleh pelbagai agensi terhadap kejadian tanah jerlus di Jalan Masjid India di ibu kota ini, mendapati insiden itu berlaku akibat antropogenik (aktiviti manusia), cuaca dan hakisan terhadap lapisan tanah tambak bawah permukaan kawasan terjejas.

Kementerian Sumber Asli dan Kelestarian Alam (NRES), memaklumkan satu laporan teknikal hasil siasatan berkaitan geologi dan struktur bawah permukaan akan disediakan kumpulan Task Force Struktur Tanah Masjid India yang diterajui Dewan Bandaraya Kuala Lumpur (DBKL) dalam masa tiga bulan.

“NRES melalui Jabatan Mineral dan Geosains Malaysia



Lokasi kejadian tanah jerlus di Jalan Masjid India yang mengorbankan seorang wanita warga India pada pertengahan Ogos lalu.

(Foto BERNAMA)

(JMG) telah membantu dalam siasatan bawah permukaan kawasan kejadian tanah jerlus di kawasan Jalan Masjid India yang membabitkan seorang wanita warga India.

Guna GPR dapatkan gambaran
“Siasatan JMG menggunakan peralatan Ground Penetration Radar (GPR) bagi mendapatkan

gambaran strata geologi dan sistem utiliti bawah permukaan kawasan kejadian bagi tujuan proses pemulihan menyeluruh oleh pihak bertanggungjawab,” katanya dalam kenyataan semalam.

Dalam kenyataan itu juga, NRES menegaskan Kuala Lumpur adalah selamat untuk dihuni.

Bagi perancangan masa

panjang, NRES memberitahu, pemantapan terhadap aspek pemantauan, penyelenggaraan, prosedur dan kaedah penyiasatan bawah permukaan meliputi struktur binaan bawah tanah, dapat mengenal pasti dan mengelak sebarang ancaman tanah jerlus dan lubang benam yang mungkin berlaku.

NRES berkata, JMG sedang

menambah baik data bawah permukaan kawasan Lembah Klang yang meliputi 10 pihak berkuasa tempatan (PBT) melalui Projek Pemetaan Geologi Sub-Permukaan Greater KL bagi melengkapkan maklumat sedia ada mengenai keadaan bawah permukaan Kuala Lumpur yang telah dijalankan di bawah projek 3DKL.

“Dari segi geologi, batuan dasar di Kuala Lumpur didasari sejumlah anggaran 30 peratus batu kapur dan 70 peratus terdiri daripada batuan granit serta batuan metasedimen, iaitu Formasi Kenny Hill, Syis Hawthornden dan Syis Dinding.

“Manakala, kawasan tanah jerlus adalah didasari batuan syis, filit dan kuarzit Formasi Kenny Hill,” menurut NRES.

Pada 23 Ogos lalu, seorang wanita dikenali sebagai G Vijaya Lakshmi, berasal dari Kuppam, Andhra Pradesh, India hilang selepas terjatuh ke lubang sedalam lapan meter di Jalan Masjid India.

Operasi mencari dan menyelamatkan (SAR) wanita berkenaan tidak berhasil sebelum dihentikan sepenuhnya pada 31 Ogos lalu selepas pihak berkuasa mengambil kira pelbagai faktor keselamatan terhadap pasukan operasi SAR. BERNAMA